

Broj: 01-07-304-01/18
Mostar, 27.02.2018. godine

Na osnovu člana 13., člana 15. stav (2), člana 16. stav (3), člana 21. stav (1) tačka 2) i tačka 6), člana 22. tačka 1) i člana 57. stav (3) Zakona o električnoj energiji u Federaciji Bosne i Hercegovine („Službene novine Federacije BiH“ broj 66/13 i 94/15), člana 10., člana 11. i člana 23. stav (1) i stav (2) Statuta Regulatorne komisije za energiju u Federaciji Bosne i Hercegovine („Službene novine Federacije BiH“ broj 24/14 i 91/15), člana 32. stav (3) Poslovnika o radu Regulatorne komisije za energiju u Federaciji Bosne i Hercegovine („Službene novine Federacije BiH“ broj 29/14 i 31/16), člana 20. Pravilnika o snabdijevanju kvalifikovanih kupaca električnom energijom i postupku promjene snabdjevača („Službene novine Federacije BiH“ broj 89/14) i Odluke Vlade Federacije BiH o utvrđivanju pružaoca javne/univerzalne usluge i usluge rezervnog snabdjevača („Službene novine Federacije BiH“ broj 84/14), Regulatorna komisija za energiju u Federaciji Bosne i Hercegovine - FERK je na IV redovnoj sjednici održanoj 27.02.2018. godine donijela

O D L U K U

o davanju saglasnosti JP Elektroprivreda BiH d.d. - Sarajevo na prijedlog cijene usluge javnog snabdjevača za pružanje univerzalne usluge

Član 1.

- (1) Daje se saglasnost JP Elektroprivreda BiH d.d. – Sarajevo, kao imaoocu dozvole za snabdijevanje električnom energijom - dozvole I reda i javnom snabdjevaču na prijedlog cijene usluge javnog snabdjevača za pružanje univerzalne usluge, sadržane u Prilogu 1. Odluke o utvrđivanju cijena usluge javnog snabdjevača JP Elektroprivreda BiH d.d. – Sarajevo za pružanje univerzalne usluge broj: NO - 2370/18 - 67./2. od 25.01.2018. godine.
- (2) Odluka o utvrđivanju cijena usluge javnog snabdjevača JP Elektroprivreda BiH d.d. – Sarajevo za pružanje univerzalne usluge broj: NO - 2370/18 - 67./2. od 25.01.2018. godine iz stava (1) ovoga člana, sa Prilogom 1. te odluke, sastavni je dio ove odluke i nalazi se u prilogu iste.

Član 2.

- (1) Cijena usluge javnog snabdjevača iz člana 1. ove odluke početak će se primjenjivati 01.04.2018. godine.
- (2) Cijena usluge snabdijevanja od javnog snabdjevača JP Elektroprivreda BiH d.d. – Sarajevo koju je FERK utvrdio Odlukom broj 01-07-977-04/17 od 24.11.2017. godine („Službene novine Federacije BiH“ broj 95/17) prestaje se primjenjivati 31.03.2018. godine.

Član 3.

JP Elektroprivreda BiH d.d. – Sarajevo, kao imalac dozvole za snabdijevanje električnom energijom - dozvole I reda i javni snabdjevač, obavezno je na svojoj internet stranici i u svojim ovlaštenim kancelarijama za odnose sa krajnjim kupcima objaviti cijene usluge javnog snabdjevača.

Član 4.

Ova odluka stupa na snagu danom donošenja, objavljuje se na internet stranici i oglasnoj tabli FERK-a, te se dispozitiv ove odluke sa prilogom iz člana 1. stav (1) ove odluke objavljuje u „Službenim novinama Federacije BiH“.

O b r a z l o ž e n j e

Članom 13. Zakona o električnoj energiji u Federaciji Bosne i Hercegovine propisano je, između ostalog, da se elektroenergetskom subjektu u opštem ekonomskom i društvenom interesu može nametnuti obaveza javne usluge koja će osigurati sigurnost snabdijevanja, redovnost, kvalitet i cijenu snabdijevanja, kao i zaštitu životne sredine, uključujući energetska efikasnost, upotrebu energije iz obnovljivih izvora i zaštitu okoline, a sve u skladu sa važećim propisima Federacije BiH i međunarodnim ugovorima koje je zaključila Bosna i Hercegovina. S tim u vezi, propisano je i da su, kao dio obaveze javne usluge, elektroenergetski subjekti kojima je ta obaveza nametnuta dužni pružati univerzalnu uslugu snabdijevanja električnom energijom svim krajnjim kupcima iz kategorije domaćinstva, malim preduzećima i komercijalnim kupcima na području njihovog djelovanja, u skladu sa elektroenergetskom politikom Federacije BiH, tako da navedeni kupci imaju pravo biti snabdijevani električnom energijom određenog kvaliteta po razumnim, lako i jasno usporedivim i transparentnim cijenama. Članom 15. stav (2) ovog zakona propisano je da će se razvoj tržišta električne energije provoditi u skladu sa elektroenergetskom politikom, reformom elektroenergetskog sektora, tim Zakonom, provedbenim propisima donesenim na osnovu zakona i akata Državne regulatorne komisije za električnu energiju i FERK-a. Članom 16. stavom (3) istog zakona propisano je, pored ostalog, da se elektroprivredne djelatnosti proizvodnja električne energije za kvalifikovane kupce koji se snabdijevaju od javnog snabdjevača u skladu sa članom 13. stav (9) istog zakona, distribucija električne energije, kao i snabdijevanje električnom energijom kvalifikovanih kupaca, koji se snabdijevaju od javnog snabdjevača u skladu sa članom 13. stav (9) zakona, obavljaju u okviru vršenja obaveze javne usluge. Članom 21. Zakona o električnoj energiji u Federaciji Bosne i Hercegovine propisane su nadležnosti FERK-a uključujući nadzor tržišta električne energije i davanje saglasnosti na cijene usluge javnog snabdjevača nakon potpunog otvaranja tržišta električne energije. Članom 22. tačkom 1) Zakona o električnoj energiji u Federaciji Bosne i Hercegovine propisano je da je FERK obavezan u skladu sa međunarodnim normama i standardima Evropske unije, Elektroenergetske politike, reforme energetske sektora, provedbenim propisima i aktima FERK-a osigurati postepeno uvođenje, regulisanje i razvoj tržišta električne energije, kao i osigurati transparentne i ravnopravne odnose između svih učesnika na tržištu. Članom 57. stav (3) ovog zakona propisano je da u slučaju kada kvalifikovani kupac ne iskoristi pravo

izbora svog snabdjevača ili kada mu snabdjevač nije dostupan nakon otvaranja tržišta, ima pravo na snabdijevanje električnom energijom od javnog snabdjevača u skladu sa članom 13. stav (9) zakona.

Članom 20. Pravilnika o snabdijevanju kvalifikovanih kupaca električnom energijom i postupku promjene snabdjevača, propisano je da javni snabdjevač predlaže cijene usluge javnog snabdjevača, po kojima isporučuje električnu energiju u okviru univerzalne usluge, u skladu sa Metodologijom za utvrđivanje cijena usluge javnog snabdjevača za pružanje univerzalne usluge u Federaciji BiH. Takođe, ovim članom je propisano i da cijene moraju biti predložene FERK-u najkasnije 60 dana prije planirane primjene istih, kao i da FERK daje saglasnost na predložene cijene, a u slučaju da cijene koje je predložio javni snabdjevač nisu utvrđene u skladu sa spomenutom metodologijom, FERK neće dati saglasnost na predložene cijene, u kojem slučaju FERK utvrđuje cijene usluge javnog snabdjevača u skladu sa ovom metodologijom. Propisano je i da je javni snabdjevač, nakon dobijanja saglasnosti FERK-a na predložene cijene usluge javnog snabdjevača, odnosno nakon što FERK utvrdi cijene usluge javnog snabdjevača, obavezan na svojoj internet stranici i oglasnoj tabli objaviti cijene usluge javnog snabdjevača koje uključuju cijenu nabavke električne energije, cijenu usluge snabdijevanja javnog snabdjevača i cijenu usluge korištenja prenosne/distributivne mreže.

Vlada Federacije Bosne i Hercegovine je Odlukom o utvrđivanju pružaoca javne/univerzalne usluge i usluge rezervnog snabdjevača, JP Elektroprivreda BiH d.d. – Sarajevo, kao nosiocu dozvole za snabdijevanje električnom energijom – dozvole I reda, dodijelila status javnog snabdjevača sa obavezom pružanja javne/univerzalne usluge snabdijevanja električnom energijom i usluge rezervnog snabdjevača na području svog djelovanja. Na osnovu naprijed navedenih odredbi, JP Elektroprivreda BiH d.d. – Sarajevo je dostavilo FERK-u 31.01.2018. godine svoju Odluku o utvrđivanju cijena usluge javnog snabdjevača JP Elektroprivreda BiH d.d. – Sarajevo za pružanje univerzalne usluge broj: NO - 2370/18 - 67./2. od 25.01.2018. godine primljenu pod brojem 01-07-883-09/18, gdje je u Prilogu 1. utvrđen prijedlog te cijene na osnovu Metodologije za utvrđivanje cijena usluge javnog snabdjevača za pružanje univerzalne usluge u Federaciji BiH. Uz spomenutu odluku, javno preduzeće je dostavilo i podloge vezane za izračun predloženih cijena, kao i prateću dokumentaciju. Prijedlog cijene usluge javnog snabdjevača JP Elektroprivreda BiH d.d. - Sarajevo, kao imaoca dozvole za snabdijevanje električnom energijom - dozvole I reda, zasniva se na planiranoj potrošnji aktivne električne energije i obračunske snage, te planu potrošnje prekomjerno preuzete reaktivne energije za kupce koji će se snabdijevati u okviru univerzalne usluge. JP Elektroprivreda BiH d.d. – Sarajevo, kao javni snabdjevač, u skladu sa članom 4. Metodologije za utvrđivanje cijena usluge javnog snabdjevača za pružanje univerzalne usluge u Federaciji BiH, osigurava potrebnu energiju i snagu za kupce koji imaju pravo snabdijevanja u okviru univerzalne usluge po prosječnoj cijeni od 73,33 KM/MWh.

Trošak nabavke električne energije za kupce koji se snabdijevaju u okviru univerzalne usluge sa troškom usluge snabdijevanja planiran je u iznosu od 233,394 miliona KM. Trošak korištenja distributivne i prenosne mreže u ukupnom iznosu od 204,164 miliona KM utvrđen je primjenom tarifnih stavova za korisnike distributivnog sistema iz

Odluke o tarifnim stavovima za korisnike distributivnog sistema Javnog preduzeća Elektroprivreda Bosne i Hercegovine d.d. – Sarajevo. Ukupan trošak javnog snabdjevača za snabdijevanje kupaca u okviru univerzalne usluge na godišnjem nivou planiran je u iznosu 437,558 miliona KM.

Prijedlog cijene usluge javnog snabdjevača JP Elektroprivreda BiH d.d. – Sarajevo glasi:

CIJENA USLUGE JAVNOG SNABDJEVAČA - JPEPBIH									
TARIFNI ELEMENTI	JEDINICE MJERE	DIFERENCIRANJE	DOMAĆINSTVA		OSTALA POTROŠNJA				
			I tar grupa	II tar grupa	I tar grupa	II tar grupa	III tar grupa	IV tar grupa	V tar grupa
1	2	3	4	5	6	7	8	9	10
MJERNO MJESTO KUPCA	KM		4,80	4,80	9,65	6,90	4,80	4,80	6,90
OBR. SNAGA	KM/kW/mjesec		0,00	0,00	16,52	0,00	0,00	0,00	0,00
AKTIVNA ENERGIJA	fening/kWh	VEĆI	13,46	16,82	14,89	23,91	13,46	16,82	19,13
		MANJI		8,41	7,45	11,95		8,41	
PREKOMJERNO PREUZETA REAKTIVNA ENERGIJA	fening/kvarh		0,00	0,00	3,22	0,00	0,00	0,00	0,00

Prosječna promjena cijene usluge javnog snabdjevača po grupama i kategorijama potrošnje iznosi:

kategorije i grupe potrošnje	promjena tarifa (%)
0,4 kV - domaćinstva I TG	0,0000%
0,4 kV - domaćinstva II TG	0,0000%
0,4 kV - domaćinstva - ukupno	0,0000%
0,4 kV - ostala potrošnja I TG	3,5968%
0,4 kV - ostala potrošnja II TG	-0,7128%
0,4 kV - ostala potrošnja III TG	0,0000%
0,4 kV - ostala potrošnja IV TG	0,0000%
0,4 kV - ostala potrošnja V TG	-0,5571%
0,4 kV - ostala potrošnja - ukupno	1,1406%
UKUPNO	0,3152%

U cijenu usluge javnog snabdjevača nije uračunata naknada za podsticanje proizvodnje električne energije iz obnovljivih izvora energije i iznos poreza na dodatu vrijednost koje javni snabdjevač ima obavezu evidentirati na svakom pojedinačnom računu kupca, u skladu sa važećim propisima.

U cilju pravilnog i blagovremenog informisanja kupaca električne energije, FERK je obavijestio javnost o podnesenom prijedlogu cijene usluge javnog snabdjevača za pružanje univerzalne usluge JP Elektroprivreda BiH d.d. – Sarajevo preko svoje internet stranice, na kojoj je javnosti bio dostupan i sam prijedlog sa pratećom dokumentacijom i pojašnjenjima. Na osnovu pažljive analize dostavljenog prijedloga cijene usluge javnog snabdjevača za pružanje univerzalne usluge, FERK je utvrdio da je prijedlog cijene usluge javnog snabdjevača, sadržan u Prilogu 1. Odluke o utvrđivanju prijedloga cijena usluge javnog snabdjevača JP Elektroprivreda BiH d.d. – Sarajevo za pružanje univerzalne usluge broj: NO - 2370/18 - 67./2. od 25.01.2018. godine, utvrđen u skladu sa Metodologijom za utvrđivanje cijena usluge javnog snabdjevača za pružanje univerzalne usluge u Federaciji BiH, te je odlučeno kao u dispozitivu ove odluke.

PREDSJEDNIK FERK-a
Jasmin Bešo

Dostaviti:

- JP Elektroprivreda BiH d.d. – Sarajevo
- Kancelariji sekretara FERK-a
- Sektoru za pravne poslove
- Sektoru za tehničke poslove i licence
- Sektoru za tarife i tržište
- Sektoru za finansije
- Sektoru zajedničkih poslova
- oglasna tabla
- a/a